

U prostorijama DTV „Partizan”, gdje je smješten Centar sovjetske sportske delegacije, izaslanstva nekih gradova ove zemlje, kao gest posebnog priznanja Sarajevu, otvorila su izložbu fotografija „Zimski sportovi u SSSR-u”, filatelije i sportske literature. Za sutra najavljen je na istom mjestu susret Sarajlija i novinara sa kosmonautom Aleksejem Leonovim i prvakom svijeta u šahu Anatolijem Karpovom, koji će sa domaćinima odigrati simultanku na 20 ploča.

Tu je i Dubrovnik, koji je pod sintagmom „Dubrovnik Sarajevu” sinoć u Narodnom pozorištu ponudio zanimljivu priredbu, kao, kako je rekao dubrovački gradonačelnik Tomislav Milković, „poklon dubrovačkih dramskih i estradnih umjetnika Sarajevu, domaćinu XIV ZOI, učesnicima i gostima Igara”. U izvrsnom programu učestvovali su Gradski orkestar Dubrovnik, Mješoviti zbor „Libertas”, „Dubrovački trubaduri”, Frano Lasić, Milo Hrnčić, Ibrića Jusić, Ivo Dražinović, Đelo Jusić, Folklorni ansabl „Lindo”, „Plakiri”, Izet Hajdarhodžić, Miše Martinović...

KOMFOR SELA „B”

Zahvaljujući ovakvim novim gostima, impresioniranim onim šta je Sarajevo učinilo u organizaciji Olimpijade, i same Sarajlije otkrivale su – putem štampe, radija i televizije – ritmove i pulseve koji otkucavaju u njihovom gradu i u domaćaju njihovih očiju.

Primjer tzv. Olimpijskog sela „B”, hotela „Igman” na istoimenoj planini, u tom pogledu samo je jedan od ilustrativnih detalja. Po onome šta je objašnjavano novim gostima, a što je štampa precizno prenosila, naime, i mnoge Sarajlije su prvi put saznavale o tome gdje su i kako žive, na primjer, takmičari u nordijskim disciplinama i biatlonu na planini Igman.

Tako saznaju da su pod krovom hotela „Igman”, odnosno „Sela B”, smještena 353 takmičara i 130 njihovih pratilaca, trenera, asistenata i drugog osoblja.

Jednodnevni boravak u hotelu – „Olimpijskom selu B”, košta 35 dolara i to su nacionalni komiteti zemalja učesnica Sarajevske olimpijade bili obavezni da još prije nekoliko mjeseci uplate na račun Organizacionog komiteta. O potrebama sportista da imaju sve što im je potrebno u ovom atraktivnom objektu brine se ekipa od 204 djevojke i mladića, kojima pomaže 15 iskusnih stručnjaka iz dubrovačkog hotela „Libertas”. Tu su, pored njih, i služba protokola od deset ljudi; osam prevodilaca; 38 zdravstvenih radnika; 40 hostesa; 12 sportskih informatora; 25 službenika PTT-a i deset kurira. Svi oni, od prvog do posljednjeg, zaduženi su i obavezni da učine sve što je potrebno da stanovnici „Olimpijskog sela B” imaju potpuni komfor, sve usluge koje eventualno zatraže i u potpunosti ispunjenu satnicu dnevnog rada i boravka koja je odavno utanačena i verifikovana od strane MOK-a.